

Tutele des minorancis: la delegazion dal Consei di Europe si confronte cu la ARLeF

A Udin si è fevelât di promoziun, protezion e implementazion dai dirits, cuntune atenzion particolâr pe aministrazion publiche, pe scuele, pai media e pes tecnologjiis

Si è tignût a Udin, te sede de Region Autonome Friûl-Vignesie Julie, un incuintri impuartant tra la Agenzie regionâl pe lenghe furlane (ARLeF) e il Comitât consultîf independent su la Convenzion cuadri dal Consei di Europe pe protezion des minorancis nazionâls. La visite de delegazion e fâs part dal percors di valutazion dal 6^t Rapuart di Stât su la metode in vore de Convenzion, che la Italie e à ratificât tal 1997 e che e tutele dutis trê lis lenghis minoritariis de Region: il furlan, il sloven e il todesc.

I components de delegazion – Ingeborg Birnie – Havenga (Paîs Bas), Erzsébet Sándor – Szalay (Ongjerie) e Detlev Rein (Gjermanie), acompagnâts di Maxime Huot dal Segretariât dal Consei di Europe – a àn scoltât cun atenzion une relazion detaiade su lis azions plui impuartantis metudis in vore par tutelâ la lenghe furlane intai ultins cinc agns.

Tal incuintri, si son discutûts tancj aspiets peâts ae promoziun e ae protezion dai dirits linguistics, massime par chel che al tocje l'ûs dal furlan te aministrazion publiche, te istruzion e intai media. Si son presentadis la storie e la evoluzion de lenghe furlane, de nassite fin al so ricognossiment uficiâl.

La delegazion e à fat domandis su la organizazion dal insegnament dal furlan intai diferents grâts scolastics, su la adesione dai students, sui materiâi didactics a disposizion e su la formazion dai insegnants. Cun di plui, si è fevelât dai finanziaments pe lenghe furlane, dal ûs dal furlan intai rapuarts cu lis fuarcis dal ordin e inte sanitât e ancje de presince de lenghe intai social media, su la stampe e sul lavôr.

A son stadis cjapadis in exam ancje lis dificultâts leadis ae mancjade aprovazion dal messâl in lenghe furlane. Tra i elements plui inovatîfs che a son stâts frontâts, la atenzion si è concentrade sul disvilup di gnovis tecnologjiis par furlan e sul fat che a son aziendis privadis che a doprin la lenghe furlane intes lôr ativitâts. Il Comitât al à pandût il so interès pes tematichis che a son vignudis fûr dilunc dal incuintri e si è imprometût di lâ inmò plui insot tai arguments tratâts.

L'event al à rapresentât un moment fundamentâl par confrontâsi e par monitorâ il stât des politicis linguistichis intal Friûl-Vignesie Julie, confermant l'impegn comun tal valorizâ lis minorancis e la ricjece culturâl europeane.

Udin, ai 10 di Avrîl dal 2025

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<